

四庫全書

集部

欽定四庫全書

竹溪鬳齋十一葉續集卷二十三

宋 林希逸 撰

行狀

宋龍圖閣學士贈銀青光祿大夫侍讀尚書後
村劉公狀

曾祖炳贈宣教郎妣鄭氏贈孺人游氏恭人
祖夙承議郎著作佐郎累贈中奉大夫妣林氏贈令人

父彌正朝議大夫吏部侍郎累贈少師妣方氏贈魯國夫人林氏魏國夫人

咸淳五年正月二十九日龍圖閣學士正議大夫莆田縣開國伯食邑九百戶後村先生劉公卒年八十三前數夕有大星隕公寢室後俄而公逝莆之大夫士皆揮淚以相弔有方歛而往枕尸以哭者有既殯而往拊棺以哭者莫不盡哀又數日則泉南之南閩北之北弔唁往來交馳于道又數月則四方交舊與凡得銘得序得

跋得詩之友不遠千里而來力不能來亦以書至蓋不
知其幾皆曰斯文無所宗主矣吾儕無所質正矣後進
無所定價矣茫茫宇宙人物何限其能擅一世盛名自
少至老使言詩者宗馬言文者宗馬言四六者宗馬雖
前乎耆老後乎秀傑之士亦莫不退遜而推先卒至見
知於人主者古今能幾人哉公雖得名得壽得祿而愛
公者猶以用公未盡為恨是豈私相好耶吁若公者可
謂千載之士矣公諱克莊字潛夫世為莆田人自大著

正字崢嶸艾軒之門聲振乾坤間已蔚然為文章家矣
公生有異質少小日誦萬言為文不屬藁援筆立就初
名灼以聲律冠胄子入上庠場屋士至今誦之嘉定已
巳郊恩奏補將仕郎更今名初調靖安簿帥曹爭檄寘
幕下潔齋袁公時以倉蕪府尤以文字見知俄丁少師
憂終制注福州右理曹改差真州錄參蒞坡崔公帥維
揚因公白事喜曰吾於閩得二士君與子華也銳欲致公
會李公珏建閩金陵辟沁江制司準遣一時幕府諸賢

自勉齋黃公而下皆相敬愛及謀進取公有異議主謀者忌之公求南嶽廟去薦員及格猶欠一考八桂胡公楓以經司準遣辟公辭地遠魏國力勉之八桂佳山水胡與公倡酬幾成集嶺外帥權重不輕餞客公入京進卷胡公飲別榕臺桂人以為前未有也甲申改宣教郎知建陽縣新考亭之祠祀朱范劉魏四君子於學庭無留訟邑用有餘增糴賑糴倉二千斛大書其門曰聊為爾民留飯椀豈無來者續心燈西山真公記之更朔西

齋北山陳公篆其扁為之賦于為之什西山在朝以公
學貫古今文追騷雅薦西山還里公以師事自此學問
益新矣言官李知孝梁成大箋公落梅詩與朱三鄭五
之句激怒當國幾得譴安晚鄭公時在瑣闥力為釋辨
以免終更綵旗蔽路送者踰數十里比聞公喪猶有重
趺來哭者得倅潮陽趙至道猶以嘲詠謗訕彈之毒由梁
李也刑寺下所屬究實公若不聞邑丞虞德羔素昧以
士民公論上府漕使陳公汶社之界以京削主管仙都

觀俄通判吉州端平改紀安晚當國甲午春有旨都堂
審察西山帥閩以機幕辟除將作簿兼帥司參議官公
迎魏國之官魏國自哭少師不出戶者二紀矣西山知
公吏材高府事一委之平齋洪公遷西掖奏公自代安
晚曰中書眼高西山以戶書召公援例求退詔以匠簿
供職公奉魏公還里踰月獨入京九月除宗正簿西山
喜曰方是本色公在麟寺南塘為卿游二公間以文字
相好歡甚西山夢奠乞假會葬不許乙未六月除樞密

院編修官兼權侍右郎官未幾鄭喬並相公輪對言服天下莫若公今失之私鎮天下莫若重今失之輕陛下因私天位遂德柄臣因德柄臣遂失君道非公也因私天位遂疎同氣因疎同氣遂失家道非公也大臣憂讒畏譏而有狼跋之嗟厭事避權而動魚羹之興非輕歟或以匹夫橫議而改政或以走卒偶語而易令非輕歟次篇言柄臣壞朝綱開邊釁兵驕楮賤貪饕僥倖之俗不可回諸賢起而當之天人未應陛下遂疑君子而思

小人曾肇有言上意漸變臣思此語可為寒心願陛下
堅凝初意無使邪說搖正論則天下幸甚貼黃痛言荅
川之事出於迫脅向止議其罪不原其情近雖復其爵
未雪其冤皆時所難言也公於上前奏讀玉音所問隨
事敷陳或言陛下向待柄臣太重今待大臣太輕或言
更化之初奄嬖屏息近因軍卒小警此曹頗得進言陛
下若聽用之天下事去矣或言陛下聖心待濟王本不
如此只是臺諫給舍一等小人遂有後面一段施行當

治其罪以滌此謗繼絕一事他日國本既定決不容已
或言向者權柄下移陛下欲除一吏不可今從官宰相
皆自聖擢又言向者近臣惟真德秀魏了翁小臣惟蔣
重珍陳埴敢與故相異論今人人得攻大臣議朝此更化
美事又言弓旌所招近稍稍引去蔣重珍既去洪咨夔
又引疾如此則諸賢漸去別一副當人來矣上曰無人
任事公言今日如人久病沉痾已深用君子如服參苓
雖無近效猶有生全之理用小人如服烏喙一劑喪生

矣殿上下之人皆謂公小官初對音吐琅琅從容如許
廊廟器也疏出鶴山魏公果山游公實齋王公南塘平
齋時皆在朝擊節不已實齋因奏疏有曰蕪旬之間嘉
謀迭進有益聖學蓋為公與杜立齋王臞軒發也狂酋
入寇朝議以元樞曾公建督曾辟竹湖李公與公參議
不果行丙申左府語泄有錫第表郎之傳鶴林舍人疑
其過已遂以吳昌裔疏罷御史舍人弟也主管玉局觀
尋除漳州殺齋鄭公言於朝謂去非其罪丁酉改知袁

州有旨趣行公在郡一以崇風化肅紀綱訪故家禮名
賢為先務因寬得衆郡以最聞殿中蔣御史公同舍郎
也因火災倡邪說為學舍所詆知鐵菴方公前在諫垣
言濟邸事太切天意不怡遂以公與鐵菴臞軒同疏皆
嘗言故王者三公居同里既歸相與賦詠無虛日自以
同傳為榮俄主雲臺觀文清李相當國擢公江西提舉
改廣東提舉公不以入嶺為難道潮惠謁昌黎祠訪坡
公舊迹庚子元日始至以嬰孺視嶺民以冰玉帥寮屬

歲計羨而商征寬民夷安之八月升漕文清薨史獨相
經理兩淮屯田敷耕牛於廣右公以事關邊儲急為區
畫既應令而民不知異時表謝有曰每於吏民相告語
之間具言朝廷不得已之意指此以諷也識者誦味之
留粵兩年更攝帥舶俸給例卷皆却不受買田二百畝
以贍仕於南而以喪歸者南人刻石紀之辛丑令赴行
在奏事侍御史金淵謂公以清望自擬寢召命主管崇
禧觀癸卯元日除侍右郎官又以濮斗南疏罷仍舊崇

禧甲辰秋社與范同相除江東提刑一意訪求民瘼澤
物洗冤効廣信貪守黥南康黠胥皆有與援者公論稱
快十一月除將作監未幾改直華文閣因任范日忌公
託言歲旱民飢艱於擇代沮其入也范去游獨當國與
參與抑齋屢以公薦丙申四月令赴行在奏事時方禱
雨公雖治任而拯飢雪枉備極焦勞留至七月乞謁告
省親不許道除太府少卿八月望入脩門二十三日面
對三劄首言委任之失二其一蒿之以借助滅殘今為

戰以厚幣奉俸蓋為和以清野感國為守土者非長徒
尚智術豈堪倚仗若非天去其疾他日必貽朝廷之憂
其二曰昔者不擇其人而任之太專今也雖擇其人
而不授以柄但見調護使之勿言宣諭使之奉詔又言
謀謨之誤二其一曰大臣有翕受之量而無主宰之功
同列有不說之漸而無駿假之和易一邊閭淹久而後
決遣一儒帥迫趣而始行桑維翰一日易十節郭子儀
朝聞命夕就道視今何如也其二曰廟謨睽異邪黨擲

榆殆幾反戈以自攻不憂探穴之覆出劉摯主調停而
幾覆族曾韓爭大柄而卒相京追思可畏也陛下雖有
退小人之功而虛受思小人之謗臣聞桓溫咄謂王衍
諸人自許豪傑而符堅笑之語及謝安則以為江左偉
人秦檜當言諸人但嘗啖飯觀吾致太平而烏珠將死
乃以張浚尚存為憂安之握兵初不如溫浚之挾權初
不如檜而二國皆慢彼畏此今陛下託國將求如溫如
檜者乎抑求如安如浚者乎次言善類之合莫盛於本

朝言路之通莫盛於本朝祖宗以來甘其苦言養其直
氣有立行其說者有久而思之者有始忤而終合者有
自常調而處以清要者今陛下上法祖宗待羣臣至厚
記憶所及收採不遺恐其間尚有迹遠而孤位卑而滯
者其人昔尚盛年今已暮景願收之於霜降水涸之餘
使善類常合言路常通其意蓋以言故王者收召未盡
也讀至迹遠位卑處上問為誰公曰從臣如王遂徐清
叟方大琮庶僚如湯巾潘枋不幸已歿存者如黃自然

王邁自然近已向用餘人皆年事已高願陛下收錄之
三言江東使事以恤貧民處流民為最急貼黃以親老
求歸養玉音曰朕知卿文名有史學即盼錫第之命仍
任責修纂公退見果山坐未定宸翰已至劉某文名久
著史學尤精可特賜同進士出身除秘書少監令與尤
焞同任史事庶累朝鉅典早獲成書次日兼國史院編
修官實錄院檢討官又三日御筆兼崇政殿說書公四
辭錫第再辭史事晚講皆不許十月朔轉對言今日之

深憂莫如國本未建援引甚詳且曰臣謂此事在唐宣宗後唐明宗孝宗於禁中也皆擇於未入之前定於既入之後異其封爵別其名稱自幼至長自姪為子不待建儲而人望已有所繫矣若朝取一人焉暮取一人焉一出焉一入焉舉棋之勢未定當辟之冀浸廣非所以重宗廟尊本統也于是有自內學退歸者故公及之孟祀御筆時暫兼中書舍人同院庸齋趙公時行下三房公以趙已除法從乞以上房易之奏上不許三學友朋

喜曰此真舍人也時史相未終喪以草上疏乞挂冠上批服闋除職予祠臺諫從藁交章詆之皆不付出十二月初九日御筆嵩之今已從吉守本官職致仕公奏曰嵩之有無父之罪四無君之罪七舊相致仕合有詰詞今臣行嵩之之詞未知為褒為貶若從其自乞則合用杜衍歐陽修之例何以示天下後世若為貶辭則不坐下罪名秉筆何所按據此綦密禮所以必請高宗御筆然後草奏檜罷制也上令丞相宣諭可作自陳行詞付下御前所

錄嵩之奏狀令體此降制公又奏御筆有守本官職之
文未知所守何職本官見封永國公合以本官見封階
官帶永國公致仕十四日御筆史嵩之除觀文殿大學
士致仕公又奏昨日進講側聆玉音已降除職指揮臣
清旦待班東華門未知所除何職講退方聞臣竊見高
宗朝前左相沈該落大觀文致仕孝宗朝左相葉顥以
雷變罷不除職只守本官奉祠左相葉衡魏杞去位皆
終身資政今嵩之忠孝有虧所除職名乃與元勲重德

無異竊聞外廷之論皆咎臣不合奏審公議實可畏也
乞詳臣元奏寢罷嵩之職名只守永國公致仕容臣行
詞十六日中使宣諭史嵩之除職致仕卿已遵承又復
入奏可依已降批諭行詞公又奏詞臣命詞須合典故
嵩之若以階官永國公致仕則職在掖垣今除大觀文
則合宣鎖降制此乃學士院職事竊見紹興二十五年秦
熈特授少師觀文殿大學士嘉國公致仕正與嵩之一
同係學士院降麻臣若侵官內制豈不貽笑天下是日

王倫復宣諭嵩之除職既係學士院降麻卿可一面書
行公奏云連日齋瀆聖聰未敢重陳容臣於經筵審取
聖旨十七日與給事趙無情舍人趙庸齋同上繳奏十
八日上又命謝瀆山諭旨公遂丐祠不允二十二日
御筆嵩之依所乞守金紫光祿大夫永國公致仕除職
指揮更不施行游相稟公云諸賢盡力回天聖主舍已
從人書之簡冊有光多矣便可書行命詞公為此制有
曰我聞在昔求忠臣於孝子之門人謂斯何豈天下有

無父之國未上二十四日殿中侍御史章琰疏罷猶以
奏審為罪安晚時在湖濱冒雪祖餞以鄒道鄉事相勉
公在省八十日草七十制學士大夫爭相傳寫以為前
無古人丁未二月除直寶文閣知漳州時有仲氏工部
之戚公以太夫人年高力辭安晚再相除直龍圖閣主
明道宮戊申元日除宗正少卿公又苦辭余時備數編
修官袖公手書以白五月依舊職知漳州公以戌期遠
方拜命是月又除秘閣修撰福建提刑欲公便養也公

又辭不允九月朔即家建臺公方申嚴使事訪疾苦扶
善良以哀矜讞獄以孤遠拔士甫及月丁魏國憂哀慕毀
瘠三年如一日庚戌十一月除秘書監公以禪制未終
辭辛亥春有旨趣行四月到闕兼太常少卿直學士院對
劄二首言端平變局侔於元祐今陛下登庸舊弼垂意
至寧而人謂端平之政改矣端平之心亦改矣次言朝
廷之士議君上者或以掖庭或以戚畹或以聚歛議大
臣者或指除授或指賓客或指子弟道路之傳皆曰君

相厭之臣以為不然惟聖主可以責善惟賢相可以責備其意甚忠其辭甚婉五義之諫諷居其一不知公者或以為訝貼黃乃以建儲為請曰臣於端平乙未以樞掾對嘗啓其端丙午孟冬以少蓬對又嘗言之越三日孟祀即有貴州刺史之命臣既去國今五六年節旄雖建王爵雖疏名號未正聖意未白願陛下早圖之上皆嘉納公退見丞相乞召潘凱吳遂二人皆忤相國者大拂相意語諸客曰千辛萬苦喚得來又向那邊去然公

本無心外庭之訝相國之忤皆悞矣五月兼崇政殿說
書六月兼史館同修撰時事多內出公言祖宗盛時內
降絕少間有一二有論列者有繳駁者有執奏者誨純
仁寧謫而不以濮議為是必大茂良寧去而不與兩知
閣並立衍寧罷而不肯求容權貴之門今中外除授間有
不由大臣啟擬者求者予者奉行者習以為常但日依
應臣竊為陛下君臣惜之又言衍之所以能卻內降者
當公僅三數月而已蓋小臣能以去就為輕雖大事可

論大臣能以去就為輕則內降可執橫恩可寢其語頗
諷當國於是愈落落矣公已決意賦歸而上眷甚隆相
亦勉諭凡六上祠請再乞挂冠皆不許公亦以禮官逼
裡祀未敢數瀆十月除起居舍人閏月兼侍講公雖遽
延數月未能決去而前後進言愈切史宇之除工侍公
不草答詔曰宇之一未更事少年使之從上雍非顓俊
尊上帝之誼臣前攝詞垣未行嵩之之詞不樂臣者已
橫加誣讟今若秉筆褒字之之美人謂臣何京尹規謀

小利京民苦之公言昔之理財者摧抑富商之盜利權者
逐什一養口體者不問也削弱豪家之侵細民者營升
斗育妻子者不問也漢算緡錢下逮末作唐為宮市白
奪樵夫今何異此時江浙名藩多付戚畹公言擇守不
過兩塗一曰才望二曰資格今穉齒登鵬序弱冠佩虎
符昔人以四十專城為榮今不待四十矣凡向者近省
均佚名流補外之地今皆以處若人百姓何賴馬山相
經營復出事有萌芽公直前奏曰陛下曩語羣臣以為

某人決不復用今都人競傳曰落致仕矣建督府矣又
曰某人嘗以御槓示人矣又曰陛下戒其勿修怨矣臣
知陛下萬無此事設或有之此誤不小向使疇昔在朝
終始不廢偃月之禍不過及士大夫今以埒國之富震
主之威繆為恭順陰懷怨毒外豈可付以寸鐵內豈可
假以寸權秦檜再相未嘗不牢籠李光胡寅久則當世名
臣舉族貶竄閤門廢錮上而至尊亦有靴中匕首之防
此陛下商鑒也敵主新亡或傳北運以哀荆徂一勝蜀

謀再舉公言趙范欲圖唐鄧唐鄧不可得而棗陽先生
安隨郢復均房皆為丘墟趙彥呐欲圖秦鞏秦鞏不可
得而劍閣不守五十四州遂成蕩覆豈非外重而不能
禦內虛而無以守臣謂江陵固然後可以援襄樊重慶
實然後可以圖漢中范與彥呐前事可鏡也言雖峻切
上獨優容察官鄭發若不相樂是月十九日疏入公方
進講玉音曰卿與鄭發無他否既退疏不下御筆除職
予郡道聞安晚薨旅哭甚哀曰吾不忘知己之舊謝吳

並相壬子正月除右文殿修撰知建寧府二月兼福建
運副鄭憤前疏不行再論褫職寢新命六月依舊職提
舉明道宮公優游里閭作為新居揭宸翰所賜樗菴後
村二扁日與賓客觴詠其間曰吾得此足矣寶祐丙辰
矩堂董相欲以治使處公丁大全沮於上前曰劉某恃
才傲物遂有正言邵澤之疏實丁意也仍奉明道祠景
定庚申師相魏公還朝公方奏疏引年除起居郎再辭
不許九月兼權中書舍人公猶在道十一月朔面對首

劉言凶相弄權以富彊自詭輔聖君而行霸政為天下
宰而設騙局人曰相非相駟也政事堂非政事堂龍斷
也傳者嘆其形容之工末言國以危懼存以供樂亡其
警告者甚切曰陛下必持勝必慮危已竄者毋至量移
已斥者毋復親近大臣必弼違必格非士大夫毋以清
談廢務毋以浮文妨要人以為藥石之言次言貪吏可
懲奚問名勝贓罪狼籍而曰為賢者諱春秋書法八議
舊典恐不如是其意有所指也聞者是之讀畢以老蒙

收召謝玉音曰知卿愛君憂國至老不衰所以欲得相
見除擢兵部侍郎兼中書舍人兼直學士院立螭纔三
日爾十二月兼史館同修撰初上過東宮見公書肆所
傳文集喜之未除兵侍前一日中使傳宣諭曰卿居閒
日久著述必多可錄本進呈公辭以容臣繕寫俄有旨
再索公辭以史事猥冗未及點對越數日以古賦古律
詩記叙題跋詩話共二十六卷奏進皆辛亥以後所作
也翌日中使以宸翰御制賜公曰卿風姿沉邃天韻崇

故今觀所進近作賦典麗而詩清新記腴贍而序簡古
片言隻字据經按史謂非有裨於緝熙顧問可乎先儒
有言學富醇儒雅辭華哲匠能非卿不足以語此真儒
臣希濶之遇也辛酉正月將降科舉詔公以非科第辭
同院進藁不稱旨命廟堂改屬曰非劉某不可三月兼
侍講四月以病辭西掖詔從之俄除兵部侍郎八月再
兼中書是歲乞引年者再九月厲文翁除泅江制閬公
不待黃至與給事徐公繳奏酉時黃至又奏是夕一更

御筆至逼趣書行公又繳奏其言甚苦命遂寢壬戌三月除權工部尚書陞兼侍讀李桂除察公力排之桂已入臺次日疏出全臺待罪朝紳皆謂與艾軒疇昔繳謝某同今上在東宮亦語宮端徐公曰劉中書此舉其高公雖身兼兩制詞命填委寒暑無間坐至四鼓而一念之忠言無不盡故淫雨有疏大水有疏和糴之害有疏拯飢有疏猶有五管見馬其言剴切允當帝心至如大全既死則曰李石責北司有言李訓固可罪因何人以

進乞斥其內訌與主者指當時貴璫也連海歸順邊患
浸紓公言禁中排當太密湖山丹艘浸盛願毋忘透渡
時江桂二閫密圖起廢公言史以怯懦邀功李以閉城
縱寇罰未當罪其可牽復乎或言簿錄姦贓之財圩田
御庄之入合以助糴本補和糴此陸贄散小儲成大儲
捐小寶固大寶之說或言右選勅牒冗濫補授多稽考
難戰士捐軀得賞而補授帖牒死歸他人蠹國無端何
以示勸每奏多則萬言少亦數千人皆美公之忠純而

服公之整暇八月再乞納祿御批曰覽卿來奏求退甚
勇詞垣經幄方資文儒輸情甚真難奪雅志特除寶章
閣學士知建寧權文昌得真學士異恩也御賜玉柄寶
簪宸製五言書其上以金纈香茶侑之竹湖以後未有
也師相亦賦詩贈行從橐飲別道山堂分賦御製詩韻
時人比之二疏公既還里優游觴詠甲子秋以目青謝
事除煥章閣學士守本官致仕其年先帝棄羣臣公哭
臨哀慟丁卯右目亦苦赤障遺身自樂處之裕如也四

年五月今上念先朝遺老御筆劉某謝事先朝年德俱高
特除龍圖閣學士仍舊致仕人謂嗣聖將起公矣公早
受知忠肅賈公辨章尤相親敬古公碧梧二揆皆公文
字友而天不憖遺國嗟殄瘁嗚呼惜哉公娶王融林氏
贈淑人寶章國博之女先公卒四十二年子三人強甫
朝奉郎三省架閣添差福州通判明甫奉議郎卽武軍
通判山甫承奉郎監嶺口鹽倉女一人適正獻福公之
孫故通直郎惠安知縣陳琰孫男八人沂登仕郎渙洙

將以京選二澤分奏澈履漢錦絢尚幼孫女五人已嫁者承奉郎監嶺口鹽倉方廣翁修職郎浦城主簿方公權餘未筭是年十二月十九日諸孤奉公之柩葬城北徐潭之原公負間世之才問學所積源流三世公探索涵泳又深造而自得之無書不讀發以詩文持論尚氣節下筆關倫教一篇一詠脫藁爭傳初年即見知於諸老溫陵竹隱傳公知晦翁謚議乃公所筆寄聲願納交趣召道甫造公之廬覽公近作曰疊疊逼人屢以疏薦

潔齋在豫章得公代邵家賀正表喜曰酷似李雲龍勉
公加意南塘為西宗得公諸作於北山甚奇之或問北
山潛夫諸作如何北山曰不患不好只患忒好公歸自
桂林迂道見南塘於三山讀公南嶽藁稱賞不已自此
遂為文字交水心評公詩曰當是建大將旗鼓者西山
知公尤至端平初貽書廟堂曰當今詞人惟趙某劉某
謂南塘也乙未夢奠于京門人諸賢俱在獨以遺表屬
公果山得公雜詠二百首手之不置曰一章雖十字皆

史斷也辨章師相尤奇公之文每得公所作必令吏錄之自西山諸老既沒獨歸然為大宗工四方大紀述皆歸後村氏銘叙先世勲德以不得公文為恥公嘗笑曰吾賣文以資老者也公見地既高而學有定力窮達得喪是非毀譽寄之歌詠一付嬉笑梅花數聯以詩得謗也而畧不以為悔巴陵一疏以言獲譴也而不自以為高前後四立朝共不盈五考非無虬蟬之撼含沙之射而未嘗恨其人既有邱明子夏之疾黑白如故往來交

際飲笑自如每曰某親某友年皆後我木已拱矣老我
於今皆剩底歲月自管窺室乃徐先輩故居結廬其間
佳客過從時與同宿有以青囊術見者豈無異議但笑
以視之非達乎公吏事素長自領邑建陽最聲已著為
麾為節剖決如神處事件件有方畧在番司臬獄案千
紙一覽盡得其要而行之以恕息菴湯公嘗語余甚嘆
服之安晚亦曰潛夫真材吏為文名所勝故人不盡知
之雖中間與晚少忤而追思痛悼時見吟篇暮年狀其

行事幾萬餘言每語人曰安晚實知我公嘗以成集屬
余序之諸作皆高律詩尤精絕李唐諸子所不及至於
駢語雖祖半山曲阜而隱顯融化鍵與沉表制之外諸
啟尤妙自成一家他人或相倣倣神氣索矣甲子以來
又為渾深簡到之語嘗語余曰吾四六又一變公有前
後續新四集已行於世其在新集者半出於目青之後
口誦成篇子姪筆受鎔煅諸書字字嚴密無一篇不可
垂訓非徒詩也其於當世交游先後輩皆名流傑士姓

字班班見集中不可悉數余屢擯於是去公所居差近每
一篇成即以見寄時有商榷以余為知言疾革既默諸
子問以遺奏屬僕如何公瞠目領之奏上君相嗟惜贈
銀青光祿大夫與致仕遺表恩澤將謀請謚諸孤俾余
狀其事欲上之太史碑銘墓表則屬之東澗湯公陽巖
洪公擇齋徐公皆平生密友亦遺命也謹狀

竹溪鬳齋十一葉續集卷二十三

欽定四庫全書

竹溪鬳齋十一藁續集卷二十四

宋 林希逸 撰

行狀

工部侍郎寶章閣待制林公行狀

曾祖幹不仕祖采贈修職郎父麟贈朝請郎

母余氏贈恭人繼李氏贈恭人

景定三年正月上以虹節下周尊黃耆漢事三老之詔

除公實章閣待制仍舊祠同命者三人皆耆年不可致
特旌異之也公於是時先上章告老矣命未至而公卒
聞者皆曰公擯於時十載今政瑟改調四方名勝收拾
褒顯殆盡典刑遺老雖遠不忘使公少留君相之意豈
如是而已惜哉公諱彬之字元質姓林氏先世名三山
石井國初徙莆自游洋遷郡城左則中興後也少與王
臞軒方鐵菴齊名中興百年言詞賦者以莆為首而公
尤表表其間端平乙未以詞賦第二人擢第時西山真

先生典舉深用稱賞以為得人分教惠陽南方士子翕然宗之再調福建常平幹官爭擁鹽新議上帥漕數干言慷慨條析痛言其害至有黃巾必擾於山孫恩必擾於海之語聞者凜然議隨寢甲辰謁選校文別所除書庫官遷武學諭通判福州兼西外丞時安晚鄭公當國知公為西山許予甚鄉之戊申以國薄召九月為明陞舉冊官十月除監察御史閩人曰是能與諸司爭鹽議者必為真御史也上以老成重厚用公公亦感激知遇

不以沽激要虛名誓殫忠愛以報首疏論天命人才民心其言關國大體次言括田之害曰利之一字自古為人主心術之蠹決擇不可不明取舍不可不審開阡之利惑孝公而害秦鹽鐵之利蠱武帝而害漢德宗以裴延齡為度支憲宗以皇甫鏐主財計而害唐此明鑒也今世理財固為急著然興利於利源既竭之後立法於法意已盡之餘非集衆思參公論不可今以一樞臣主之彼生長富貴之家翼以要功黷貨私人臣恐利未興

而害滋大時短史之勢方張公獨不顧上嘉納之又言
皇祐五年仁宗春秋四十四太常博士張述請立皇嗣
已有社稷未有所托之言今陛下春秋過於仁宗皇祐
時決大議立大本容可緩耶又言彌遠用鄭損棄關而
基蜀漢之禍寓之招北兵入城而兆樊襄之變以數百
年生聚之地淪為鬼魅化為榛莽陛下豈可忘襄蜀淪
覆之恨而不加念乎兩淮百姓家室流離延息沙洲逃
死不暇主兵之臣但曰我步彼騎難與爭鋒列竈連營

畏敵如虎而以閉門自守為上策於是數千里蕭條數十城孤立運米江浙以餉糧坐之兵竭財大農以守不耕之野徒曰敵哨雖來空無所得糧盡自去可以苟安豈不中其減水困魚之計陛下猶徒恃清野而不改圖乎人皆以為至論已酉春又言雷雪大作寒如深冬積潦重陰彌月不已此非小變也臣以天意觀之必有召怨於民者蓋和糴變為敷糴民已不堪而州縣有糴發運有糴總所有糴帥有糴分頭應辦煩擾百出此科抑

之召怨一也大農告匱通財無策乃行征權之政或隨
戶掙鹽或增稅取羨有絲粟之利則官攘之有升斗之
贏則官征之此權法之召怨二也近親之田不問權門
之田不問乃以民戶世守之業指為官物以耕種不可
施之地勒令輸租抑米於茫茫之水指廩於空空之屋
議臣曰區畫已定圖籍可成橫奪虛張為欺為暴此括
田之召怨三也民怨釋則天意回矣四月朔日食公又
言扶陽抑陰三事首曰今日未嘗不用君子而君子之

勢未固未嘗不去小人而小人之根尚蟄王魯張知白
雖在朝而丁謂方圖覆出吕大防范純仁雖共政而楊
畏挾詐方深恐妖鬼孽狐乘昏嗥嘯姦謀逆計必累陽
明此天之所以示變也其意指山相云庚戌遷左司諫
中冬有雷公又言易之游雷震為長子主器之義彖亦
曰守宗廟以為祭主乃者一陽方復內卦為震而有雷
聲之異天其以此警陛下為國本計乎昔范鎮嘗告仁
祖曰陛下許臣三年矣乞行前奏今臣分察之初首陳

皇嗣當建聖度如天曲賜容納今且兩年資善雖建益國雖封而錫名之典尚爾悠悠宜臣不能已於言也上曰朕志已定公退而自喜曰宗社之福也竟不以語人辛亥九月將有事明堂時有密薦淳祐權臣者公力以扶道凝定力為請其言曰自景祐慶厯至於至和嘉祐有以朋黨之論撼君子者有以好名之說排正論者女童習書以誣介弼內侍密疏以讒修襄賴仁祖堅定不搖一竦既去遂不復來而文富歐韓始終任遇所以四

十餘年如一日也元祐之事則有可悔者矣陛下臨御以來寶紹權臣嘗以私意壞吾之紀綱端平更化始從而培植之淳祐柄臣又以私意盜吾之權寵甲辰更化始從而董正之今邪徑欲絕而不能限來者之多戶庭欲峻而不能勝求者之巧某遷某職不曰當遷而疑以媚竈計行某入某闕不曰合入而謂其通神力勝名都藩府如券取價穹官好爵惟意所欲富貴之柄人主所操也而使嗜進亡恥之人可以博取幾於倒持矣公道

之脈定力不足扶之乃有泯滅彞常慚負戴履之人朶
頤羊鼎伺隙以投竊步翳行布置愈密臣恐刑揚之弄
奸京檜之貽禍復見於今日讀疏未畢上曰嵩之斷不
復用公又退而喜曰宗社之福也定國本扼權姦當時
以二事為大樞紐聖意要終不可搖公於此有功多矣
壬子除殿中侍御史心思目前擅利病民莫甚於京尹
而無敢言者遂以第一義力攻之其言曰今之戶部先
朝三司使也陳恕定茶法則以中等為可行不探利以病

民也張方平論鹽法則以再推為不可欲弛禁以惠民也今醢醬薪炭幹取不遺田野市朝怨怒日積攘漕司酒課而京畿之漕莫能支幹倖廳牙契而天下之倖不可為括鹽之法密則處處有場推酤之禁苛則在在有庫甚至旁侵禮部之權下行司農之事禁嚴之地分置私人九重意向內庭動息無不知者長此安窮其言甚切疏入令家人束裝俟命上俾訥齋程公諭公程公辭曰臣嘗與之同臺知其必以死諍尹既除紹興都人莫

不稱快而疏猶未出公又入奏即以臺牒趣之上疑非
舊典遂有今後不許用臺牒之命預叅徐公乃援端平
生逐袁韶之例以告上意始解卒行其言乃以余天任
攝事公因講次又言天任非才密以裕齋馬公為薦上
首肯再三俄而余晦尹京以私意仇諸生激怒右庠之
士上下紛紛公率同列以奏曰小司成蔡抗既去諸學
官亦求去三學士人又捲堂而去陛下何惜一晦而使
紛紜至此如士心何如國體何晦遂罷未幾吳子明除

大理丞公言子明本一庸人以恩澤補右選既換文資
守郡未及考又除朝職班列之臣恥與噲伍上遣中臣
宣諭以元奏付還公又言陳舜封以科第進及為大理評
事太宗聞其父為伶人以宰相不能澄汰流品改授殿
直此陛下家法何愛於子明宣諭至再曰當從卿請勿
使趨班俟假及期却令丐外可易元奏以進公曰臣積
忱未至無以感動聖心臣之罪也疏如可易是自虧臣
職自辱臺綱必孤陛下所以用臣之意臣不敢奉詔公

既屢忤旨自分必斥十月除工部侍郎公徑出闕上累
遣中人諭公公求去益力上又命右司李公諭旨勉留
公始就職內引力陳知足知止之請玉音曰從班無人
卿未可去同修撰國史實錄兼權侍左侍郎為殿廬詳
定官及晦入蜀公又直前言宣諭使非其人公素與時
相謝瀆山議論不合晦謝所主也至是愈落落矣遂力
丐外以集撰知婺州婺人迎境上公徑歸五上免牘提
舉太平興國宮乙卯除知寧國府公又辭左相訥齋以

書勉公一出丙辰六月至郡蠲旱租減酒課嚴府第私
酤折強宗幹僕事有毫縷便民切切行之以吳衍疏罷
領事凡五月不私支一孔一縑邦人服其清儉次年復
職予祠今丞相還朝益加器重而公以老無意於世矣
郊裡奏補吏以正郎權從必隔郊特與奏行人知傳相
所以眷公者公謙厚人也平居與人言惟恐毫末傷其
意至居言責獨有孜孜當世之心在臺五年奏疏傳落
人間不少雖不以直求譽而多言人所難言其詳有圉

山家集姑撫其關繫之大者著之又如迎逢獻羨時習
方酣公乃以孝宗懲進獻邀賞之臣令戶部刷上供舊
欠獨行按劾為奏且曰希進之寵濫及盜臣括利之名
累及人主而使四方受橫征之害於國何利哉新寺之
役衆諍莫回公乃以韓魏公諫大悲殿蔡端明諫開寶
塔為奏且曰邊境多虞國力已困何不留此費積此財
以為練兵遣間繕甲治械之用是又因進故事而言者
人或未之知也公賦性純慤事繼母李恭人以孝稱自

少至老日不廢書甘於清貧先廬僅數丈晚聚所得祿
賜僅葺數椽故居有園山樓因以自號歲晚食祠廩者
三獨處蕭然不過蒼頭數輩飡不重味身無鮮衣所趣
極枯淡嘗曰吾之始生外祖夢有高軒入其門左右呼
曰林侍郎吾止矣得聞自喜易簣夷然公與臞軒同生
於甲辰以文字相好臞軒之文英園山之文粹筆力異
而臭味同白頭如一日臞軒試玉堂而公始第園山登
臺省而臞軒沒公之沒後臞軒十四年實辛酉十二月

二十六日享年七十有八積階朝散大夫贈中大夫其
綸言有曰殿作前賦膾炙一時袖中彈文芬芳千載持
橐方隆於主眷請魔力避於相嗔人曰盡公始終之美
此後村劉公所草也娶方氏繼葉氏先公卒並贈恭人
以景定三年十二月初九日辛酉合窆城西之原子孫
若干余因臞軒納交於公既以乙未同進相與三十年
每見握手吐肺肝知公心事為甚悉聞公之逝哭之數
日述公言行以傳信來者余之願也辭雖不工字字皆

實錄後村之密友即許為銘杰也欲藉此以請余固於公有不慙之悲又幸公有不朽之記矣

湖南提舉官講太史禮部李公行狀

曾祖德暉從事郎南恩州陽江令祖永年贈承事郎父宗之奉議郎通判邵武軍贈中大夫

公諱丑父字良翁先世會稽人唐天寶末與隱君秦系俱避地溫陵徙居於莆六世祖思也丞相正獻陳公於度支郎建州守事狀言之度支諱德昭陽江於度支為

弟政和名進士世守詩書至邵武以文名其鄉未第時
授徒城北執經者歲數百人諸史百家口答疑問人曰
伯可書厨也公幼而穎悟讀書迎刃解出語輒驚人既
授室獨寢夜誦達旦母趙令人每勸止之猶篝燈坐帳
內學成以文游諸公間後村劉公臞軒王公鐵菴方公
甚奇其才年四十一始拔鄉解明年擢第端平初改紀
典舉異常時西山真公平齋洪公兩實齋蔣公王公實
妙一世之選同院皆名人無輕許予西山得公詞賦擊

節稱賞叅詳意一徐公得公第二場喜曰為國得人于
時名重一榜鐵菴語人曰伯可昔以論名艮翁不忝矣
調邵武戶曹家食五載始至捐俸復廨舍太守嘉其意
助成之漕使項公寅孫雅知名檄致幕下公屢辭不許
憲康公植倉趙公綸爭薦之建守王公實齋座主也俾
子弟就師焉項移兼帥與公偕來丁令人憂服除久未
謁選後村鐵菴皆以書趣之京尹節齋趙公初以筦庫
辟既見曰是不足為艮翁浼改辟節制司準遣安晚鄭

丞相與語喜甚曰某於莆得潛夫實之德潤今又得兄
可謂緣熟除刑工架閣庚戌省試檢點官選太學正沂
王府教授安晚意鄉公為門下諸客所忌公又時以所
聞忠告相雖喜而諸客不樂以臺疏罷添差幹辦淮浙
發運司分職京口今平章時制兩淮以學問深醇文采
鉅麗薦考舉應格改宣教郎添差通判福州公嘗攝郡
廣文士聞其來皆喜綉使康公多以奇書難義詰寮案
獨公應答如流遂以貳車領學事聲譽烜然再倅建安

攝府事一毫無所私繼守庸齋趙公以學問切磋相得
歡甚秩滿除太學博士歸謁諸坐夷猶十閱月劄以學
官不可久虛趣行丁巳冬抵京遷諸王宮教授先是圓
山林公在臺丁方營進以公多同鄉同年屢求轉囑公
應且憎丁以為憾既當軸已落落不合公以其怪繆百
出議論多譏之千峰陳公忤丁去國無敢餞者公獨留
江潯越宿丁客沈肅誦公私闡發策曰吾當北面公聞
而笑曰吾文豈願此曹稱佳丁與肅愈忿俾言者劾去

既歸曰吾師淵明矣買草堂西隙地即亭山也因以自
號景定庚申善類一泰予祠崇禧隨以大府丞召道中
遷秘書郎校文公闡竣事去國添差淮東制叅應李公
異待之滿歲除著作佐郎景獻府教府癸亥春遷著作
郎權禮部郎官適大璫董宋臣差講所承受公與同寮
力拒之命遂寢九月以班對公曰吾兩登朝皆不及玉
階而去今不盡言是自負也齋戒沐浴草兩疏首言苛
征戚畹黷貨聽言四事且曰本末備體統該綱紀張政

事舉此堯舜禹湯文武植立中國盛際陛下承帝王正
統當以中原盛際為法四弊不除將為世運升降之會
辭不逼切而關涉大憂慮深知言者是之次言競侈二
習曰游士競邊功借補競求攝添教正教競於郡土著
游學競於京天下之官冗矣而吏銓大小使臣諸閭都
副鈐轄斗量車載皆競之效也娼優后飾輿阜玉食漿
酒藿肉窶夫如董賢之雙珠被晶盤里婦有秦虢之貴
風俗頹弊浙中為甚過於朱某告先朝時皆侈之積也


二習不去長此安窮穆陵嘉納之甲子春請外提舉湖
南常平義倉常時戶絕之爭產多沒入公務存繼之曰
毋使其家有若敖之餒決廢婦久訟不以勢奪條社倉
舊規虛額必足桂陽豪民龔某乘敵禍屠王媪家八口
冤訴久過公巡歷立決之人以為神明屬西全寶慶兩
守貪虐怙勢脅制諸臺公謀劾之機泄為所擠乙丑以
臺疏去公笑指其足曰是間有鬼吾歸休矣廟堂憐其
非罪畀崇禧祠咸淳丁卯五月某日以疾卒享年七十

四積階至朝散大夫四以進書邸講轉郊恩元士命下
不及見矣公溫良和易曾次灑然與人無新故一語
必用情見者皆曰德人德人少游竹隱傳公之門傳李
雲龕自出也詩文四六各有法度公頗似之每味南豐
諸作曰吾所由入者其文溫潤含蓄削去穠華其詩清
婉而有味儷語極清新所居與後村為隣賡酬無虛日
晚歲傳藁尤富後村素以文字官期之初擢第意未厭
儻一室西湖修宏博之業寒暑不解衣未幾曰可以

應令矣戊戌中程喬孔山重於取放格不下交游曰艮
翁不由此科不為兩制乎及在東淮後村為詞臣奏公
自代既歸儀曹人曰筆生華矣豈料文章竟不得力遂
為劉賓客乎家素清貧雖稍沾祿賜僅僅自給而析其
半為義廩與弟姪共之聞者以為難歿之日自處夷然
後村往候之舉手為別而暝有文若干卷未編次藏于
家初娶林氏先公卒三十年贈恭人繼室以其娣封恭
人先後皆賢善居室公賴以自佚終身守書卷家之有

無不問也子二人長濟孫登壬戌第迪功郎主六安簿
次勤孫迪功郎安豐尉孫一人將以遺澤奏女四人鄉
貢進士方之巽林公晉何應采太學待省進士吳澧其
壻也將以其年十有一月二十五日葬壚峰之陽仙溪
東其孤囑余狀其事曰後村翁許為銘矣余於公為同
升相與最篤密間留溪上共榻而寢語至寤白及與余
迭為表郎頗以自喜余南歸公出使書問不少間乙丑
余留徐潭公載酒一再又與後村同餞宿古棠三日賦

詩飲酒樂甚豈知四十年筆硯之交竟訣於此集嗚呼
傷哉握筆投淚未能詳公之美姑識其本末云爾



竹溪鬳齋十一藁續集卷二十四

欽定四庫全書

集部

竹溪鬳齋十一集續集卷二十五

詳校官庶吉士_臣李傅熊

主事_臣呂雲棟覆勘

總校官知縣_臣楊懋珩

校對官助教_臣胡予襄

謄錄監生_臣翟灝

欽定四庫全書

竹溪鬳齋十一藁續集卷二十五

宋 林希逸 撰

學記

太玄精語

予雲作太玄以擬易昔人以為僭惟韓退之屢稱之至我朝康節司馬老泉却喜其書康節用其數老泉論其旨司馬公為之註獨東坡乃謂以艱深之辭文淺近之

說此語固佳但子雲之辭雖非易比然亦豈易能哉潛
虛未必出於溫公其辭亦可觀視太玄則迥異矣太玄
有古意潛虛出似後世文字今取其語之精者表而出
之亦畧為解釋使讀者易曉庶有意於古書者不以坡
老一言而忽之也

中準陽氣潛萌於黃宮信無不在乎中

在歷為冬至黃宮土中也信者萬物之生意猶今曰
花信曰春消息也陽復物將生消息皆在地中矣

次二神戰於玄其陳陰陽測曰神戰於玄善惡并也

玄者心也神者心之用也擇乎理欲之間而此心未定
互有消長猶兩陣之交戰也

次六月闕其搏不如開明於西測曰月闕有搏賤始退

也

賤一作明不
如賤字佳

開明者初三四其明在西方一鈎一弓十五之後其
圓漸缺雖其明尚多其勢退矣此與其進不與其止
之意賤者不與也

次八黃不黃覆秋常測曰黃不黃失中德也

秋氣肅殺萬物覆敗常數之必然也黃中也為德不中則必至覆敗猶常歲之秋必肅殺萬物也

周
復準

次二植中樞周無隅測曰植中樞立督慮也

莊子曰樞得其環中即植中樞也植立也立於中而能運故曰植中樞周環而無方隅言不可定也衣之背縫曰督督中慮思也立中於心故曰立督慮也

磳準
屯

磳難也

次二黃不純屈於根測曰黃不純失中適也

黃中也立中道於此則萬善由之而生為中不純則
善根屈絕矣何以適中乎

關準
屯

次三關無鍵舍金管測曰關無鍵盜入門也

舍註音捨今音釋鍵鎖牡也管所以出入鍵者也關
門而無鍵雖有鎖管亦開釋矣言失防閑之道也

次六閑黃埃席金第測曰閑黃埃以德固也

埃古雉字城也第床簣也閑以金城藉以金簣人之
自防如此喻有德以自固也

少

準
謙

次八貧不貧人莫之振測曰貧不貧何足敬也

居貧而不為貧之計是以虛為盈者人誰振貸之喻
當謙而不謙者

上九密雨溟沐潤於枯瀆三日射谷測曰密雨射谷謙

之靜也

枯瀆難潤但有三日小雨則有射谷之鮒矣言謙久必益也

戾

睽

乖戾也

次五東南射兕西北其矢測曰東南射兕不得其首也
兕在東南矢射西北事相違戾何由有功

上九倉靈之雌不同宿而離失則歲之功乖測曰倉靈
之雌失作敗也

倉靈木星也其配為太白金星也金木相配而不可以同二十八宿之度太白在南木星在北名曰牝牡歲則大稔金木合為白衣之會歲大水言事有相戾而吉者離麗也作為也失則為敗也

干升

準 干進之意

次三栞鍵拏拏匪貞測曰栞鍵拏拏干祿回也

鬼谷子有內鍵飛栞篇拏拏急切貌以術干說欲求爵祿非正道也栞鍵用術以栞束鍵固之即縱橫之

術也箱渠掩切回不正也

次七何戟解解遘測曰何戟解解不容道也

何與荷同擔荷戈戟而行解解然必與物相遇言相抵觸也行道之間必不見容言小人以非道而行多抵觸也解解惹絆之意胡買切

次八赤舌燒城吐水于鉞測曰赤舌吐水君子以解崇也

以赤舌而燒城口中出火也又能吐水於鉞變幻之

術能為吾祟必有以解之赤舌吐水讒賊之喻柳子
厚有此賦

狩

準臨

狩音疎義同進也大也

次六獨狩逝逝利小不利大測曰獨狩逝逝不可大事
也

逝逝猶去去也獨進而自行可以小事不可以大事
言無助也

次八蚤虱之狩厲測曰蚤虱之狩不足賴也

疏附之小人如蚤虱然只以自取危厲而已不足賴恃也

羨

臨

羨餘也猶壁羨以起度之羨

上九車軸捫其衡相四馬就括高人吐血測曰軸捫吐血終不可悔也

捫音月折也括結也車將行而軸與衡俱捫四馬又有繫結車上之高入必墜而有傷至於吐血也言非道求贏餘反以取禍

童

準蒙

次七脩侏侏比于朱儒測曰侏侏之脩無可為也

脩長也侏侏長大之貌朱儒短小也年長而有童心

不足有為也

上九童蒙觸犀灰其首測曰童蒙觸犀還自累也

以小蒙而觸犀牛自碎其角不量力也灰蒙碎也

增

準益

次三木以止漸增測曰木止漸增不可益也

木雖止而其長有漸誰得而抑遏之蓋掩也進學日
益之喻也

次五澤庫其容衆潤攸同測曰澤庫其容謙虛大也
澤在下而諸水自歸之謙以得益之喻也

銳

澤漸

初一蟹之郭索後蚶黃泉測曰蟹之郭索心不一也

蚶食黃泉而心一蟹多足而躁反不如之荀子勸學
篇已有此喻

達

泰準

陽氣枝枚條出物莫不達

自枝別者為枚自枚別者為條言陽氣既達枝枚條皆生也一樹之間枝為大枚為小條又小者言氣自下而上大而小也

初一中冥獨達迴迴不屈測曰中冥獨達內曉無方也迴與洞同中心達而無窒礙也

次四小利小達大迷扁扁不救測曰小達大迷獨曉隅方也

扁必沔切

扁狹也見小而失大不能自救其失也所獨者止偶一方所以小也

次八迷目達腹測曰迷目達腹外惑其內也

次二曰迷腹達目言內惑而外察也此曰迷目達腹言內明而外惑也內外俱明則善矣

交準泰

初一冥交於神齊不以其貞測曰冥交不貞懷非含慙也

交於神明祭祀也雖齋而其內心不正非事神明之道心既懷非則內慙矣

次五交於鷩猩不獲其榮測曰交於鷩猩鳥獸同方也鸚鵡猩猩雖能言非人類也言交於非人祇以自辱也

次六大圈閔閔小圈交之我有靈穀與爾穀之測曰大小之交待賢煥光也

圈求晚切泰養之所也以我大養之地而交其小養

者即頤卦大烹養賢之意大養猶大畜也以我之靈
穀與爾共食之言與賢者共天祿也穀合作餽餽美
食也

次七交於鳥鼠貴其資泰測曰交於鳥鼠徒費也

所養非類徒費無益也與鸚猩同意

與準
需 與軟同柔弱之義

次五黃菌不誕俟于慶雲測曰黃菌不誕俟速偶也

速一作執古仇字也音執匹耦也黃菌靈芝也芝待

慶雲而後生需其類也

僖

準需

次六僖福貞貞測曰僖福貞貞正可服也

次七僖禍介介凶人之郵測曰僖禍介介與禍期也

介介邪僻之貌僖福僖禍即積善積惡餘殃餘慶之意

次四咄其角直其足維以僖穀測曰咄角直足不伎刺也

伎與伎同音至刺郎達切刺狼戾也詘角不觸初也
直足行以正也以此待祿必可得也穀祿也
次八不禍福侯天活我測曰禍不禍非厥說也

無取禍之尤而不幸得禍少待其定天必活我說與
尤同即雖在縲紲而非其罪之意

上九僭僭天撲之顙測曰侯僭之撲終不可治也

僭者病人仰而向天顙額也言惡人為天所棄何所
仰望亦徒僭也

從

準隨

初一日幽嬪之月冥隨之基測曰日嬪月隨臣應基也
日於幽隱之時而求其婦月於冥晦之時而隨從之
言合朔之始也基始也言君臣相得於隱微之中即
遇主於巷之意

次四鳴從不臧

鳴從巧言以求合也雖得其從終不善也

次七拂其惡從其淑雄黃食肉

言去惡從善猶藥用雄黃可去惡肉而生新肉也拂除也

進準晉

初一冥進否作退母測曰冥進否邪作退也

夫道而進其終必否則今日之進所以生異日之退也故曰退母

次七進非其以聽咎窒耳測曰進非其以毀滋章也

進不以正為世所毀其過咎滿耳之聽即榮華不滿

眼殃咎塞兩儀之意

釋

準

散也

次五和釋之脂四國之夷測曰和釋之脂民說無疆也

脂澤也以中和而布散其德澤天下自然夷平

次六震於廷喪其和貞測曰震於廷和正俱亡也

廷喻內也用威不於外而於內則一家之和正俱失之矣

格

準

非

次五膠漆釋弓不射角木離測曰膠漆釋信不結也

膠漆既開釋則角不可用矣何者弓之角與木已離不合矣言人心無所固結豈能用以禦難

次六息金消石往小來夾測曰息金消石美日大也

息生也金生而石消善長而惡消也所去者小所來者夾夾矣言遷善改過則其德日盛也

夷

準
太壯

傷也

次三桑嬰兒於號三日不嗷測曰嬰兒於號中心和也

號胡刀切噉所嫁切聲變也嬰兒之啼其氣和柔雖三日之久而聲不變也此用老子之意言人能和平其心則無所傷也

次四夷其牙或飫之徒測曰夷其牙食不足嘉也

飫之徒猶曰飲食之人也貪於食而至夷平其牙所食雖多亦不足貴言不義而富貴非吾徒也

樂準
音落

次三不宴不雅噪呱啞咋號咷倚戶測曰不宴不雅禮

樂廢也

噪古吊切啞音厄咋音責呱音孤皆不樂之聲也雅雅樂也不宴飲不用正樂但噪呱啞咋以度日至於死亡而號咷者倚戶矣即今者不樂逝者其亡之意次七人嘻鬼嘻天要之期測曰人嘻鬼嘻稱樂畢也

嘻歎也小人虐衆以自樂人鬼共嗟怨之得禍必速矣要約也約少其期言不久也

上九極樂之幾不移日而悲則哭泣之髮資測曰極樂

之幾信可悔也

樂至於極哀之幾也其至不易日矣鬢資與嗟咨同
即樂極則哀來之意

爭準訟

初一爭不爭隱冥測曰爭不爭道之素也

隱冥無形之中也以不爭而善勝默運於無形之中
此天道也素即太素也

次二嚇河臞測曰嚇河之臞何可憫也

嚇呼駕切恟與怙同以口拒人曰嚇詩云伊予來嚇
人不量力如何方潰而以口嚇之徒自臞瘠何可恃
也

次八狼盈口矢在其後測曰狼盈口不顧害也

天文弧矢星在狼星後狼之噬物方盈其口而人在
後射之即螳螂捕蟬黃雀在後之意言不知後禍也
上九兩虎相牙知掣者全測曰兩虎相牙知所制也

相牙相噬也掣尺制切即下莊子刺虎之說兩虎相

鬪既弊則人皆取之矣掣卽制之意

務準

事也

次五蜘蛛之務不如蠶之綸測曰蜘蛛之務無益人也
綸音須衫帛也或作榆音遙綸翟之服也言蜘蛛雖
巧不如蠶可以為衣為服也

上九務成自敗雨成自墜測曰務成自敗非厥命也
事功既成不能自守必至於敗如雲既成雨則自然
墜落也此非天命自取之也

事準

盡

次二事在樞不咨不譖喪其哲符測曰不咨不譖其知亡也

譖與諏同樞事之始也圖事之始不謀於人自奪其鑒也哲符此心至靈至明之喻也

次四男女事不代之字測曰男女事非厥務也

以男子而為女子之事女之字育亦可代乎言人各有職業非所事而事皆失常也

次七丈人扶孤豎子提壺測曰丈人扶孤小子知方也
丈人老者也老者扶其孤而小子為之提壺尊卑之
分宜然也

更準變也

次二時七時九軫轉其道測曰時七時九不失當也
七陽盛九陽極極則必衰宜知通變如輪軫之轉則
得其道矣即通變無弊法之意

次三化白於泥溜測曰化白於泥變不明也

淄黑也黑泥可以化白乎言不知變而變則失其道
矣

次五童牛角馬不今不古測曰童牛角馬變天常也

牛有角而童之馬無角而欲角之此古今所無之事
逆天理而求異非所當變而變也

斷
準

初一斷心滅斧冥其繩矩測曰斷心滅斧內自治也

斷決於心而不見其用斷之迹曰滅斧冥者隱而不

可見也繩矩法則也法度在心不見於外也

次六決不決爾仇不閤乃後有鉞測曰決不決辜及身也

仇敵在近初不濶遠當斷不斷必有斧鉞之事在後來也

次七庚斷甲我心孔碩乃心有鑠測曰庚斷甲義斷仁也

庚義也甲仁也以義斷恩也碩大也我心所見者大

其後乃有鑠美也

上九斧及蛾蛾利匠人之貞測曰蛾蛾之斧利征亂也
蛾蛾衆多之貌匠人用此以制木此用兵制敵之喻
也

殺準
夫

上九豨殺其牙發以張弧測曰豨殺其牙人所獵也一
作吏非

殺其牙者勇用其牙欲以噬人人必張弧矢以取之

發起也小人用勢正以起兵而自禍也

裝

準

旅陽氣雖大用事微陰據下裝而欲去

立夏氣應陽雖大用事而一陰已生據於在下陽則束裝將去矣

次二鵠鵠慘於冰翼彼南風內懷其乘測曰鵠鵠之慘懷憂無決也

鵠音哥又音加鴈也慘冰怕寒也翼飛也向南而飛去寒就溫鴈所宜也今懷愛其乘匹而未決去喻人

之當退而不退也乘時證切

次五鴻裝於溜飲食願願測曰鴻裝於溜大將得志也
溜水名也鴈自北來宿於水濱得其所也願願自得
之貌

衆準師

次七旌旗絰羅干戈蛾蛾師孕唁之哭且瞋測曰旌旗
絰羅大恨民也

絰戶挂切唁音咳瞋莫佳切絰羅惹絆也蛾蛾衆多

散亂之貌師敗孕婦相弔唁也賔竊視之貌言百姓皆恨其上也

親

準此

次三螟蛉不屬螺贏取之不逐悔測曰螟蛉不屬失其體也

不屬無類也不逐悔不禦侮也言親非其親緩急不相為也逐侮猶迎敵也

次六厚厚君子秉斗測曰厚厚君子得人無疆也

厚厚親其所親也斗居中央而中星環之君子得衆之喻也

欽準
小畜

次二墨欽載載寢我匪貞測曰墨欽載載非其以先也
墨貪也載載取之盡錙銖也匪貞不正也言取民載
悉則我之政道寢失矣

次六閔而綿而作大元而小人不戒測曰閔綿之戒不
識微也

閔憂也綿微也元首也其憂雖小憂之大者自此而始言當慮微也

睟

準
乾

初一睟於內清無穢

言初心之純也無穢不雜也

次二冥駁冒睟眊於中測曰冥駁冒睟中自應也

冥冥昧之中駁雜以萌則其粹美皆冒沒矣眊與惡同漸也應於計切隱昧也

次五晬於幽黃元貞無方測曰晬於幽黃正地則也

幽冥也黃中也其晬在心也元貞大正也無方不可
定名也即是黃裳元吉之義

次七晬辰愆君子補愆測曰晬辰愆善補過也

辰時也人誰無過當過之時能以晬易愆則善矣

盛準
大有

初一盛不墨失冥德測曰盛不墨中不自克也

時雖盛而不以法則自守則失中心之德墨法也冥

心也

次五何福滿肩提禍禪禪測曰何福提禍小人之道也
何與荷同禪音纏又音丹衆多之意滿肩言不自勝
也提取也言小人受福不能自勝必自取禍
次七秉火寒泉至測曰秉火泉至禍不遠也

火方炎而水忽至必能滅之盛極必衰之喻也乘盛
也

次八挹於滿熒幾後之頃測曰挹於滿幾危也

挹損也熒熒也既盈滿之時宜自挹損而反以熒熒
自矜乃後日傾危之地也幾兆也測曰幾危者謂此
乃傾危之幾也

居

準
家人

次二家無壺婦承之姑或洗之塗測曰家無壺無以相
承也

洗蘇典切壺尊酒器也婦之事姑無盛酒之器乃行
酒於地上非禮也洗猶書曰洗腆致用酒也塗泥塗

也即在地之意

次四見豕在堂狗繫之遠測曰見豕在堂其體不慶也
遠音剛獸迹也堂尊處也既有豕在則狗亦相繼而
至也繫遠猶接跡也此自辱以招辱之喻

次八反其几雙其牝其家不旨測曰反几雙牝家用不
臧也

几以家食今反之七只用一今二之其家必不美矣
言所用失道也牝與牝同旨美也此立家不用禮法

之喻

上九株在藥其種不絕測曰株在藥其類乃長也

木斬而復生曰藥枯株再生藥則其種不絕矣書曰
若顛木之有由藥是也此既廢而復興絕而復續之
喻

法
井準

初一造法不法測曰造法不法不足用也

造作也作法而不應法何可用也

次五緇陸陸鉚寘腹井潢洋終不得食測曰鉚寘腹非學方也

緇音橘汲索也陸陸索下之貌寘音田鉚腹先填滿也潢音黃潢洋猶汪洋也索雖下井水雖多鉚既滿何以得水非虛心以求益也

次六於紀於綱示以貞光測曰於紀於綱大統用也綱紀既定而示以正大光明之道則治統得矣

竹溪鬳齋十一藁續集卷二十五

欽定四庫全書

竹溪鬳齋十一藁續集卷二十六

宋 林希逸 撰

學記

太玄精語

應離準

初一六幹羅如五枝離如測曰六幹羅如附離君也

幹木也六幹而只五枝不能輔其本矣羅列也離踈

也此君不得臣之喻

次二上歷施之下律和之非則否測曰上施下和匪其真也

歷施於上以觀星辰之行律和於下以求地氣之應律歷必更相治也非則否者違此則不可用也匪其真也言不得正法也只曰上施下和不曰非則否省文也

次三一從一橫天網罔罔測曰一從一橫經緯陳也

畏音郎又郎宕切廣大貌網有經緯而後成故曰一
從一橫此法令全備而濶疎之喻天網猶天則也自
然之法也

次六熾承於天冰萌於地測曰承天萌地陽始退也

陽長之極上至於天而陰已萌於地下矣言陽進極
而陰生也熾陽也承接也

迎準
咸

次二蛟潛於淵陵卵化之人或陰言百姓和之測曰蛟

潛之化中精誠也

蛟潛於水產卵在陵下復於淵以氣感之自然剖化
此言發於隱而雖遂必應之喻陰隱也言以誠感人
也

次六玄黃相迎其意感感測曰玄黃相迎以類應也

玄黃天地也天上地下而時乎相迎以意自相感也

與咸卦同

竈

準鼎陰雖沃而灑之陽猶熱而飮之

陰陽俱盛此灑而彼和猶相息也

次五鼎大可觴不齋不莊測曰鼎大可觴饗無意也

觴當作勗音商大亨以養聖賢亦必以禮行之今鼎雖大可以觴食而不以齋莊臨之則士不歸之矣饗無意者言其無心於饗禮也

次六五味酥調如美如大人之饗測曰味酥之饗宰輔事也

五味既和而調之又美宜大人亨之言大臣能和其

職則天子亦樂之也

次七脂牛正肪不濯釜而烹則歐歐之疾至測曰脂牛歐歐不潔志也

脂牛肥牛也肪亦脂也正肪者割之正也烹之之釜苟不精潔則人將吐之矣言養士必以禮也歐鳥后切歐哀都切歐歐吐逆之聲也

大準豐陰虛其內陽蓬其外物與盤蓋

蓬蓬然盛也盤結也陰在內陽在外而盤結覆蓋之

言外盛而內虛也

次六大失小多失少測曰大失小禍由微也

凡事之大皆因小而失之凡物之多皆因少而失之此由微至著之意也

次七大奢迂自削以觚或益之鋪

奢侈也迂遠也方大而侈遠之法能以法自律則其所養愈厚矣觚法也削自損約也鋪食也

次八豐牆峭趾三歲不築崩測曰豐牆之峭崩不遲也

牆雖豐大而削去其陞三歲之久不能更築則崩壞矣言自削其根本也

廓準

大也

次二金榦玉楨廓於城測曰金榦玉楨蕃輔正也

版築之旁曰榦其題曰楨題額也築城之具其堅固如金玉則其城可以高大矣此人君得輔佐之喻次三廓無子室石婦測曰廓無子焉得後生也

石婦無所產也其家雖大而無繼承之子以其室人

乃石婦也此輔佐不擇人而無益於國之喻

文

準

初一袷禭何縵玉貞測曰袷禭何縵文在內也

袷乞洽切禭與繪同音會何與荷同縵莫旦切袷衿
也以禭為衿而乃被荷無文之縵自晦之意也衣錦
尚絅是也繪無文曰縵

次七雉之不祿而雞蓋穀測曰雉之不祿雞幽養也
蓋進也雉不得穀而以穀養雞言失所養也

禮準
履

次四孔鴈之儀利用登於階測曰孔鴈之儀可法則也
孔孔雀也其羽毛有文鴈飛有行列喻人之有儀也
登階可進而仕也即鴻漸於陸其羽可用為儀之意
次六魚鱗差之乃秩施之帝用登於天測曰魚鱗差之
貴賤位也

差次也魚鱗有次序制禮制法秩然有次而施之於
國可以格天矣故曰帝用登於天

逃

準遜

次六多田不婁費我腠功測曰多田不婁費力亡功也
婁音樓腠戶佳反田雖多而不樓理之徒費腠食之
功也熟食曰腠

唐

準遜

次三唐素不貞亡彼瓏玲測曰亡彼瓏玲非爾所也
瓏玲玉也荒唐朴素而不守以正自喪其德以玉比
德故曰瓏玲

次五奔鹿懷麗得不訾測曰奔鹿懷麗奚足功也

鹿失不顧而以麗鼠為懷所得者不足以為訾矣訾與資同言棄大而見小也

次八唐收祿社鬼輟哭或得其沐測曰唐收祿復亡也唐遯之後而能收其祿謂廢而復興也社稷有主則其鬼不哭矣沐澤也言得其福也

次七弋彼三飛明明於征終日不歸

一弋豈能中三飛鳥平明而去至暮不歸無所得也

此求不以道之喻

常準陰以知臣陽以知辟君臣之道萬世不易

陰陽君臣之道也

初一戴神墨履靈式以一耦萬終不稷測曰戴神墨體一形也

神墨妙法也靈式善法也以一耦萬執一而萬事畢也稷日下稷也稷與昃同終不稷者言用不窮也

次七得七而九懦撓其剛不克常測曰得七而九棄盛

乘衰也

七陽之盛九陽極而衰也以柔亂而自撓其剛則不能守其常矣言處盛不自強則必衰也

次八常疾不疾咎成不詰測曰常疾不自能治也

常疾而不以為疾言病而不治也詰問也有病而不治其禍既成何所歸咎此安其危利其蓄之意

度準節陰氣日躁陽氣日舍躁躁舍舍各得其度

舍音捨躁動也舍止也陰氣動而陽氣止各得其所

也

次三小度差差大櫺之階測曰小度之差大度傾也

櫺音賴毀裂也差失也小法差失乃大法毀裂之階也此不謹小而失大之喻

次五榦不榦櫺於營測曰榦不榦不能有寧也

榦本也所本非本則其經營者皆毀裂之矣櫺毀裂也

次六大度檢檢於天示象垂其范測曰大度檢檢垂象

貞也

檢檢猶整整也范法也天垂象而聖人法之其為大法整整然可以垂後此雲漢猶天子法度之意

次七不度規之鬼即訾之測曰不度規之明察笑也

規圍也訾笑也所為不以法度則鬼笑之矣訾音子次八石赤不奪節士之必測曰石赤不奪可與有要也石赤丹砂也丹砂之色不可變移猶人之守節而可必信也有要有約也有節之人必不負所約也

永準

同人

次四子序不序先賓永失主測曰子序不序非永方也
為子而不得子之道言不知小大之序則賓主先後
之義皆失之矣此非可久之道也

昆準

同人

音混

次二白墨菲菲三禽一角同尾測曰三禽一角無害心
也

白墨菲菲羣而不亂也譬如三禽以一為之首而餘

皆尾之尾隨其後也故曰一角同尾言人之羣聚必有所長則不亂故其心無得而相害也

次三昆於白失不黑無際一尾三角測曰昆白不黑不相親也

昆同也白不同黑而自為分別無交際之道羣聚而無為之首此一民二君之意角者衆而尾者少宜其不相親也

次五穀不穀失疏數衆釐毀玉測曰穀失疏數奚足句

也

穀與穀同為車轂而失疏數之度不足為衆幅之所容言為主不得其道也衆釐毀玉猶積羽沉舟也立心不均則毀言日至賢者無所容矣旬均也釐毛也次六昆於市井文車同軌測曰昆於市井同一倫也井市人所居也昆而同之則天下皆同文同軌矣一倫者一其倫類也

減損

次六幽闇積不減不施石測曰幽闇不施澤不平也
幽微也闇大也無大無小皆自積聚而不能減損以
施人其頑如石不知稱物平施之道也

嗟
否

音欽又
音琴

次五不中不督腐蠹之嗇測曰不中不督其嗟非也
督衣縫之中也不中不督言不知中道也積而不能
散雖腐蠹之物亦吝嗇之此嗟閉之道也

守
否

次六車案輶圭璧塵測曰車案輶不接隣也

輶礙車輪之木也紫止也車為輶所止圭與璧皆積於塵埃之中此閉吝而不與人交際者之喻

次八白無杵其碓舉天陰不已白日毀暑測曰白無杵其守貧也

有白而無杵不舂米也其碓舉而不下無所碓也天陰不雨澤不下流也白日宜熱而陰晦之故曰毀此貧不得時者之喻

翕準

次三食翕嘽嘽測曰食翕嘽嘽利如舞也

嘽楚快切翕食貪食也嘽嘽貪食之貌也小人多貪見利如舞無所不至矣

次六黃心鴻翼翕於天測曰黃心鴻翼利得輔也

黃心得中也鴻翼大翼也翕於天者合於天也得大中之道而合於天賢者之喻也

次七翕繳惻惻測曰翕繳惻惻被離害也

繳音灼以繳取鳥人見之惻惻然而見利者不顧他
日必自離害也

次八擲其罍絕其罍殆測曰擲罍絕罍危得遂也

擲與揮同罍古縣反罍覆車也罍網也小人以罍罍
害物一旦揮絕而去之則雖危而可以自免矣此為
惡而知悔者之喻遂安也

聚

萃

初一鬼神以無靈測曰鬼神無靈形不見也

鬼神之靈以不可見也

次三宗其高年羣鬼之門測曰宗其高年鬼待敬也

宗尊也高年之人能尊敬之則其心可以事鬼神矣
次五鼎血之猶九宗之好乃後有孚測曰鼎血之猶信
王命也

猶與禋同鼎欲薦血而薪禋之熟之也既祀而享其
九宗以誠意相好乃有後也以王命而從事者其心
亦如此誠信可也

積準
大畜

次七魁而顏而玉帛班而決欲收寇測曰魁而顏而盜之招也

魁大也顏露也班布也自誇大自炫露而玉帛班布而示之人斷可以致寇也收者致之意

飾準陰白陽黑分行其職出入有飾

白黑相錯所以為文飾也分行其職各致其用也即剛來文柔柔來文剛之意

初一言不言不以言測曰言不言默而信也

次五下言如水實以天牡測曰下言之水能自冲也

天牡海也從諫如流如水下而歸海也實者盛之意也冲謙也

次八蛭鵠喁喁血出其口測曰蛭鵠喁喁口自傷也

蛭與蜎同喁喁鳴聲不已也血出其口自傷也多言不誠無以取信徒自苦耳

上九白舌于于屈于根

白舌者徒費舌而言之也于于屈貌根舌根也言不思信不如屈其舌根而勿言

疑準

次五螭黃疑金中測曰螭黃疑中邪奪正也

螭音雄雄黃石也以其色而疑為金在其中紫亂朱之意也

次七鬼魂疑貞厲嚶鳴弋木之鳥射穴之狐反目耳厲測曰鬼魂之疑誠不可信也

以鬼魂自疑惑乃有嘍鳴之歎既以為烏而弋之又
以為狐而射之烏黑狐赤至易見也而亦不能別之
反其目而以耳為信危矣哉

視準觀陰成魄陽成妣物之形貌咸可視

陰如月既蝕成魄而陽為妃偶言秋分陰陽均平也
次七視其瑕無穢測曰視其瑕能自矯也

視其瑕知其過也人能知過則行無疵矣穢疵也飾
矯也

沈準

觀也 下視

次三沈於美失貞矢測曰沈於美作聾盲也

貞矢正直之道也為紛華之美所沈迷則失其道矣
次五雕鷹高翔沈其腹好媿惡粥測曰雕鷹高翔在腐
糧也

雕鷹鷲鳥也沈其腹飛雖高志在實腹而已自好生
孕而乃惡他物之生育言其喜殺也媿古孕字粥與
育同沈實也

次七離如婁如赤肉鴟梟厲測曰離婁赤肉食不臧也
以離婁之明而食如鴟梟但食生肉危道也赤肉生
肉也此貪不擇祿者之喻

內準
歸妹

初一謹於娶執初貞後寧測曰謹於娶執治女貞也

娶古妃字執古仇字匹偶也娶必擇賢初得其正則
家終安也

去準
無妄

去彼枯園舍下靈淵

枯園自高之喻靈淵善淵也自處之卑也比好謙自下之喻枯園燥地也

次四去於子父去於臣主測曰去於子父非所望也

父尊子卑主尊臣卑今子居父上臣過於主皆逆也去之則順矣去逆從順以其逆道非所欲也望欲之意

次五擻其衣之庭有麋測曰擻衣有麋亦可懼也

擣音愆牽也庭有荆棘牽衣而行則麋鹿生之矣言有國有家不自脩飭則必至荒亂也

次七去其德貞三死不令測曰去其德貞終死醜也

失其正德者必死於不善非令終也三死猶離騷言九死也即多多之意

次八月高弦火幾縣不可以動動有愆測曰月弦火縣恐見咎也

月至高弦則蝕將盡矣大火幾於流則暑將往而寒

生矣皆時之喻下弦則一鈎之明在魄之上故曰高
幾近也近於縣則將西入也時去則不可有為也

晦
準
明夷

次三陰行陽從利作不凶測曰陰行陽從事大外也

陰先陽後於理為逆然世間亦有小者卑者先之而
大者尊者應之之時既相從順亦可有為不至於凶
也大者不在內而反外言異常也

次四晦其類失金匱測曰晦其類法度廢也

金匱良法也君子小人之類不明則國之良法必廢矣

次七朮提明或遵之行測曰朮提明德將遵行也

朮古霄字世方昏暗我揭明德以示之人必有從我者凡人夜中提燈照路則行人必有遵之者矣

朮準陰征南陽征北物失明貞莫不朮朮

朮古夢字又莫登反陰往南而陽往北失其位矣非相見於離之日矣小人用事則世皆失其明正之道

矣物人物也

次二明腹睽天覩其根測曰明腹睽天中獨爛也

睽失冉切視也以腹中之明而能窺見天理則可以窮究根抵矣爛明也

窮

準困

陰氣塞宇陽亡其所萬物窮遽

塞宇滿天內也遽窮也窮窘無所歸向也

次五羨無糝其腹坎坎不失其範測曰羨無糝猶不失也

坎坎空虛也貧而不失其法猶曰不改其度也範法也

上九破壁毀圭舊竈生龜天禍以他測曰破壁毀圭逢不幸也

破壁毀圭失其所寶也舊竈生龜貧之食也禍以他非自取也此賢者不逢時之喻

割

準
剝

次七紫蜺齋雲朋園日其疾可割測曰紫蜺齋雲不知

刊也

紫蜺妖氣也喬雲日旁刺日之氣也喬余律切朋聚而圍日此太陽之病也可以割而去之讒邪障蔽可以掃去也刊削也可去而不去是不知刊也

次八割其蠹得我心疾測曰割其蠹國所便也

蠹國之人我心所疾惡割而去之則得我心矣便利也去此人為國之利也

止準

次七車纍其撻馬攲其蹄止貞測曰車纍馬攲行可甌也

撻音雉又音馳輪也攲良涉切有所經也纍有所繫也車纍馬攲不可行之時宜止則止也甌敝也考工記不甌於鑿亦作甌宜止而行則敝也甌作鄰攲或作獵皆誤也

堅

良準

次三堅不凌或泄其中測曰堅不凌不能待齊也

凌冰也當冰堅之時而不成凌者其中陰為陽所泄也齊中也外能堅守而中不自持此色厲而內荏者之喻

次四小螽營營蟬其蜎蜎不介以堅蝶測曰小螽營營固其居也

與蜂同蟬與帶同蜂房之帶也蜎青許又音弋蜂房也蜂營營而為房必堅其帶不堅則房墜矣帶只在堅而不在大故曰不介以堅介大也

次五蜎大蟬小虛測曰蜎大蟬小國虛空也

蜎蜂房也蟬房之帶也房大而帶小不足以繫之則蜂必散亂而蜂窠虛矣為國而不知其本必失其民以此喻之

次六戴蟬紗紗縣於九州測曰戴蟬之縣民以康也

紗紗微小貌音幽九州之民各戴其君心有所繫如蜂房之蒂小而甚堅則可以康安矣戴與織同縣繫也

成

準
既濟

次二成微改改未成而殆測曰成微改改不能自遂也
為善方成而心已改改不待成而知其危矣

次三成躍以縮成飛不遂測曰成躍以縮成德壯也
事之既成可以躍進又縮之可以飛上而不飛隨之
言能謹畏退託以守其成則德愈壯也遂隨也

闕

準
噬嗑

闕與室同
閉門也

上九陰陽啟告其變赤白測曰陰陽啟告極則反也

啟青啟咎古化字啟咎開通訛化也陰變而赤陽變而白極則反也

失

準大過

次七疾則藥巫則酌測曰疾藥巫酌禍可轉也

酌祭以酒也此言災咎可禳也為改過之喻

次八雌鳴於辰牝角魚木測曰雌鳴於辰厥正反也

雌鳴辰旦反常也牝而求角緣木而求魚皆反正之

喻

劇

準大過

陰窮大泣於陽無介侶離之劇

侶與儔同介助也陰既窮大而陽自啼泣為無助也陽陰之離至此劇甚矣介侶即無介助黨類也

次五出野見虛有虎牧猪攬綉與襦測曰出野見虛無所措足也

野外荒虛虎牧其猪出而遇此不過攬裳而走攬與牽同襦短衣也牧逐也

上九海水羣飛獎於天杭

杭即航也海水羣飛狼方勇也弊壞也天杭即大舟也

馴準

坤

次四徇其勞不如五之豪測曰徇其勞伐善也


五中也苟伐其功勞則不如五之得中為過人也豪過人者也

次五靈囊大包其德珍黃測曰靈囊大包不敢自盛也靈善也囊有涵蓄也大包可以包容而大受也此為

珍美黃中之德以其不自大也

次六囊失括泄珍器測曰囊失括臣口溢也

有囊而不括則其珍美之器皆泄露矣此伐善矜能者之喻



竹溪膚齋十一景續集卷二十六